



SIARAN MEDIA
KEMENTERIAN KESIHATAN MALAYSIA

PELANCARAN MINGGU KESELAMATAN UBAT
#MedSafetyWeek 2025

8 November 2025 - Kementerian Kesihatan Malaysia (KKM) melalui Bahagian Regulatori Farmasi Negara (NPRA) sedang mengambil bahagian dalam kempen tahunan Keselamatan Pengubatan, [*#MedSafetyWeek*](#) yang berlangsung dari 3 hingga 9 November 2025. Kempen *#MedSafetyWeek* merupakan inisiatif global yang diterajui oleh Pertubuhan Kesihatan Sedunia (WHO) dengan melibatkan 130 organisasi di 117 buah negara. Tahun 2025 juga merupakan ulang tahun ke-10 kempen ini berlangsung di peringkat antarabangsa.

Tema bagi [*#MedSafetyWeek 2025*](#) adalah ***“We can all help make medicines safer”***. Tema ini membawa mesej amat bermakna, yang menekankan keselamatan ubat adalah tanggungjawab bersama. Selain doktor, ahli farmasi dan anggota kesihatan yang lain, pihak pengeluar ubat serta pengguna juga memainkan peranan penting dalam memastikan ubat adalah kekal selamat untuk digunakan.

Pemantauan keselamatan ubat sangat penting dalam memastikan ubat-ubatan yang berada di pasaran adalah selamat dan berkesan. Tujuan utama kempen ini adalah untuk meningkatkan kesedaran mengenai kepentingan mengenal pasti dan melaporkan kesan sampingan yang disyaki disebabkan oleh ubat-ubatan. Semua laporan kesan sampingan tempatan yang diterima akan dianalisis untuk mengesan risiko keselamatan terkini seperti kesan sampingan baharu atau menentukan tindakan pengurangan risiko ubat tersebut. Di Malaysia, KKM melalui NPRA akan mengumpulkan semua laporan kesan sampingan ubat-ubatan. Semua laporan yang diterima akan dinilai dan dikaji oleh NPRA bagi memastikan tindakan bersesuaian dapat diambil sekiranya terdapat risiko keselamatan baharu yang dikenal pasti. Dengan itu, pengguna akan terus mendapat manfaat daripada penggunaan ubat-ubatan dan risiko kesan sampingan dapat diminimumkan.

CARA MELAPORKAN KESAN SAMPINGAN UBAT DAN VAKSIN

Anggota kesihatan dan pengguna boleh melaporkan kesan sampingan penggunaan ubat dan vaksin kepada NPRA melalui beberapa saluran, seperti berikut:

Anggota kesihatan:

- Sistem Maklumat Farmasi Hospital (*Pharmacy Hospital Information System*, PhIS) bagi fasiliti KKM
- Borang diisi secara [manual](#) dan dihantar kepada NPRA melalui e-mel (fv@npa.gov.my) atau pos

Pengguna:

Pengguna digalakkan untuk berbincang dengan anggota kesihatan tentang kesan sampingan yang dialami sebelum membuat laporan.

- Pengguna boleh memaklumkan kepada anggota kesihatan untuk membuat pelaporan bagi pihak mereka.
- Pelaporan juga boleh dibuat oleh pengguna sendiri dengan mengisi borang pelaporan untuk pengguna, iaitu *Consumer Side Effect Reporting Form* (ConSERF):
 - Borang diisi secara [manual](#) dan dihantar kepada NPRA melalui e-mel (fv@npa.gov.my) atau pos.

Sepanjang *#MedSafetyWeek 2025*, orang ramai termasuk anggota kesihatan disarankan untuk bersama-sama menjayakan kempen ini dengan menggunakan *#MedSafetyWeek* di platform media sosial untuk menyebarkan bahan kempen daripada NPRA serta organisasi lain yang terlibat.

-TAMAT-

Kementerian Kesihatan Malaysia

